



KOMUNIKADO PA PRENSA

<i>Fecha</i>	<i>Account Manager</i>	<i>Email</i>	<i>Nr.</i>
21 di ougùstùs 2014	Jhanirha Anita	jhanirha.anita@gobiernu.cw	

MINISTER EARL W. BALBORDA A INISIÁ PROSESO PA DETERMINÁ RUTA DI MARCHANAN DI KARNAVAL I SEÚ

Willemstad - Minister Earl W. Alborda enkargá ku e Ministerio di Tráfiko, Transporte i Planifikashon Urbano a inisiá djabièrnè 22 di ougùstùs 2014 e proseso pa determiná ruta di Karnaval i Seú 2015 i alabes analisá posibilidatnan pa un ruta mas adekuá pa nos marchanan grandi teniendo kuenta ku e aspekto di seguridat.

Minister Alborda a invitá diferente instansia entre otro Asosashon di Gruponan di Karnaval Kòrsou (AGKK), Fundashon Kultural Seú Kòrsou (FKSK), Kas di Kultura pero tambe instanshanan di gobièrnu manera Ruimtelijke Ordening en Planning (ROP), Brantwer i Polis. E komishon yamá huntu aki tin komo meta prinsipal pa presentá posibilidatnan di adaptashonnan na e ruta aktual ku ta sali na altura di krusada Winston Churchillweg ku Rooseveltweg i terminá na Hamelbergweg banda di Hospital òf bini ku rutan alternativo ku ta pas den e kriterionan stipulá pa tur partido.

Durante e promé reunion, minister a indiká ku Karnaval i Seú entre otro ta dos di e marchanan mas grandi di Kòrsou i komo tal tin un balor agregá pa nos Pais tantu riba tereno kultural, soshal i ekonómiko. P'esei ta di sumo importansha ku den un tempu spesífiko i determiná, e komishon aki presentá diferente opshonnan na Minister Alborda pa asina e di su parti presentá esaki na Konseho di Minister.

Gruponan representando e partisipantenan, manera AGKK i tambe FKSK, tambe tin e responsabilidadat pa bai bek den nan seno i asina konhuntamente ku pueblo di Kòrsou karga ku e kambionan pa asina engrandese nos fiestanan kultural.

Minister Alborda ta konvensí ku den tèrmino kòrtiku e komishon lo por trese proposishonnan riba mesa pa asina for di trempan tur esnan envolví por ahustá i adaptá na e posibel kambionan i asina esnan konserní i responsabel por sigui ku e organisamentu di e Gran marchanan.